



EDITORIAL

Magbalik-aral sa teorya at kasaysayan para isulong ang praktika ng rebolusyon

Buong sigla ngayong isinusulong sa buong rebolusyonaryong kilusan ang isang malawak na kilusang pagbabalik-aral sa Marxismo-Leninismo-Maoismo at mga batayang prinsipyo ng Partido. Puno ng sigasig ang mga komite at kadre ng Partido, gayundin ang mga kumander at mandirigma ng Bagong Hukbong Bayan (BHB) at mga aktibista sa kilusang masa sa kanayunan at kalunsuran, sa isinasagawang pagbabalik-aral sa teorya at mga prinsipyo bilang sandata para sa pagrerebolusyon.

Nasa sentro ng kilusang pagbabalik-aral na ito ang mga sulatin at turo na iniwan ni Ka Joma (Jose Maria Sison), dinadakilang guro ng rebolusyong Pilipino, na nanguna noon sa paglatag ng mga saligang prinsipyo, patakaran, stratehiya at mga taktika ng Partido sa pagsulong ng dalawang-yugtong rebolusyon sa Pilipinas.

Kabilang sa puspusang binabalik-aral ng mga kasama ang napakahahalagang dokumentong binuo sa pangunguna ni Ka Joma kabilang ang: Iwasto ang mga Pagkakamali at Muling Itatag ang Partido, Ang Mahigpit Nating mga Tungkulin, Mga Partikular na Katangian ng Ating Digmang Bayan, Muling Pagtibayin ang Ating Saligang mga

Prinsipyo at Iwasto ang mga Pagkakamali, at ang Manindigan Para sa Sosyalismo Laban sa Modernong Rebisyunismo.

Puno ng sigla na nirerepaso ng mga kasama maging ang iba pang mga libro at akda ni Ka Joma tulad ng Makibaka para sa Pambansang Demokrasya at Lipunan at Rebolusyong Pilipino. Ang mga librong ito ay klasikong mga sulatin na nangatiling lapat sa kongkretong kalagayan ng Pilipinas na inaapi ng imperyalismo, pyudalismo at burukratang kapitalismo. Pinag-aaralan ang mga ito kaakibat ng mga klasikong sulatin ng mga dakilang gurong komunista tulad nila Marx, Engels, Lenin, Stalin, Mao at Ho. Inilalahad ng mga ito ang unibersal na katotoha-

nan tungkol sa kasaysayan ng maka-uring tunggalian at ang pangangailangan para sa rebolusyonaryong pagbabago para wakasan ang pagsasamantala at pang-aapi.

Ang bumubwelong kilusang pag-aaral na ito ay ibinunsod ng panawagan ng sentral na pamunuan ng Partido na gamitin ang iniwang kabang-yaman ng mga turo ni Ka Joma bilang gabay sa pagsulong ng rebolusyon. Bahagi rin ito ng panawagan na lagumin ang mga karanasan sa nagdaang lima at 25 taon, at tukuyin at iwaksi ang mga suhetibistang pagkakamali na nagbunsod ng mga pinsala o naging balakid sa pagsulong sa iba't ibang larangan ng gawain, at komprehensibong isulong ang rebolusyonaryong kilusan.

Sa diwa ng "walang rebolusyon kung walang rebolusyonaryong teorya," ginagamit ngayon ng mga kadre ng Partido ang Marxismo-Leninismo-Maoismo at ang mga turo ni Ka Joma para magtasa at maglagom sa kanilang mga praktikal na

karanasan, upang buuin ang determinasyon na iwasto ang mga ito at pangibabawan ang mga naging kahinaan at pagkakamali. Nagbabalik-aral sila sa kasaysayan upang humalaw ng mga positibo at negatibong aral, palakasin ang mga wastong praktika at iwasang ulitin ang dati nang mga pagkakamali.

Susi ang kilusang pag-aaral na ito sa konsolidasyon ng Partido. Kailangan ang puspusang pagpapatag para maisabalikat nito ang mabibigat na tungkulin sa pamumuno.

Ang kilusang pag-aaral ay bahagi ng pangkalahatang pagsisikap na itaas ang kaalamang teoretikal at pahigpitin ang gagap ng lahat ng kadre at mga aktibista sa mga prinsipyo at ideolohiya ng Partido, bilang gabay sa pagsusulong ng kanilang rebolusyonaryong praktika. Itinataas nito ang militansya at determinasyon ng Partido at ng masang Pilipino na lumaban sa gitna ng labis na brutal na panunupil ng reaksyunaryong estado.

Puspusan ngayon ang pagsisikap ng mga komite ng Partido na pagtapusin ang mga kadre at kasapi sa 3-antas na Kurso ng Partido. Masaligan pa, ang mga hindi nakapagbabasa ay tinuturuang magbasa sa pamamagitan ng mga programang

pang-literasi. Sa pamamagitan ng mga pagsisikap na ito, tuluy-tuloy na itinataas ng Partido ang kakayahang ng mga kadre at kasapi ng Partido na pamunuan ang iba't ibang larangan ng gawain sa iba't ibang antas. Sinasanay din nito ang mga bagong salinlahi ng mga komunistang lider at mandirigma.

Ginagamit ang Marxista-Leninista-Maoistang kaalaman at paraan ng pagsusuri para magsaliiksik sa kongkretong kalagayan, sa mga suliranin at kagyat na kahilingan ng masang Pilipino. Binibigyang-linaw nito na ang pagtaas ng presyo ng mga bilihin, mababang sahod, kawalang lupa, at iba't ibang problema ng masa sa araw-araw ay nakaugat sa pamalagian at lumulubhang krisis ng bulok na sistemang malakolonyal at malapyudal. Ipinakikita na ang pagdurusa at paghihirap ng mga manggagawa at masang anakpawis sa Pilipinas ay katulad sa esensya sa dinaranas ng masang api at pinagsasamantalahan ng monopolyong kapitalismo sa ibang panig ng mundo.

Pinatitibay ang determinasyon ng mga rebolusyonaryong pwera na itaguyod ang linyang masa, at ubos-kayang kumilos para pukawin, organisahin at pakilusin ang milyun-milyong mga manggagawa, magsasaka at lahat ng api at pinagsasamanta-




lahang uri at sektor. Ang kilusang pag-aaral na ito ay nagpapataas sa sigasig ng mga rebolusyonaryong pwera at mga aktibista na magpropaganda sa mga pabrika, mga paaralan, baryo at iba pang lugar upang himukin ang masa na magbuklod at itaas ang tapang at determinasyon na bagtasin ang landas ng sama-samang paglaban para ihayag ang kanilang mga hinaing at isulong ang kanilang mga interes.

Sa kanayunan, ang kilusang pag-aaral na ito ay ibayong nagpapasigla sa mga Pulang mandirigma na ubos-kayang pahigpitin ang pagkakaisa ng masa at ng kanilang hukbo, palawakin at palakasin ang mga larangang gerilya, labanan ang terorismo ng estado, at buong-giting na isulong ang pakikidigmang gerilya.

Sa pamamagitan ng kilusang pag-aaral, ginagabayan at tinuturuan ng Partido ang BHB upang ibayong pasiglahin ang malawak at maigting na pakikidigmang gerilya na nakabase sa papalawak at papalalim na baseng masa, at hakbang-hakbang na palakasin ang BHB mula sa maliit at mahina tungo sa malaki at malakas na hukbo ng mamamayan.

Buong lakas na nagpupunyagi ang mga mandirigma at aktibista na pakilusin ang masang magsasaka para ipaglaban ang tunay na reporma sa lupa at iba pa nilang mga kahingian sa gitna ng krisis at delub-yong hatid ng rehimeng Marcos. Pinalalawak at pinatatatag ang mga organisasyong masa at ipinupunla ang binhi ng demokratikong gubyernong bayan. Kaakibat nito, ikinakasa ang mga taktikal na opensiba para baha-bahaging lipulin ang kaaway, kunin ang kanyang mga sandata, at antas-antas na palakasin ang BHB.

Sa loob ng kasalukuyang taon, inaasahan natin na ang kilusang pag-aaral na ito ay magbubunga ng matatag na pagsulong ng buong rebolusyonaryong kilusan sa kanayunan at kalunsuran at pagsigla ng mga pakikibaka ng sambayanan para sa pambansang kalayaan at demokrasya.

<div><div></div><div>Tomo LIV Blg. 2 Enero 21, 2023</div></div>	
<div>Ang Ang Bayan ay inilalabas sa wikang Pilipino, Bisaya, Iloco, Hiligaynon, Waray, Ingles at Espanyol. Tumatanggap ang Ang Bayan ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan.</div>	
<div><div>Nilalaman</div><div><div>Editoryal: Magbalik-aral sa teorya at kasaysayan para isulong ang praktika ng rebolusyon</div><div><div>1</div><div>Pampartidong pag-aaral, inilunsad sa NCMR</div></div><div><div>3</div><div>Ka Elay, huwarang kadre at mandirigma</div></div><div><div>3</div><div>Mga protesta</div></div><div><div>4</div><div>Mula kwarantana tungong kanayunan</div></div><div><div>5</div><div>Pang-aabuso sa karapatang-tao, iigting</div></div><div><div>6</div><div>2 aktibistang dinukot sa Cebu, nabawi na</div></div><div><div>6</div><div>Ambus sa Sorsogon, isnayp sa Negros</div></div><div><div>6</div><div>Pamilya, minasaker sa Northern Samar</div></div><div><div>6</div><div>Sanggol, 2 taon nang <i>hostage</i> ng militar</div></div><div><div>7</div><div>Nagtataasang presyo ng pagkain at serbisyo</div></div><div><div>8</div><div>Sa madaling salita</div></div><div><div>9</div><div>Paggamit ng US sa Pilipinas</div></div><div><div>10</div><div>Base militar ng US sa Palawan</div></div><div><div>10</div><div><i>Aerial bombing</i> sa komunidad sa India</div></div><div><div>10</div><div>Presensya ng US sa Cagayan, itinatakwil</div></div></div></div>	
<div>Ang Ang Bayan ay inilalathala dalawang beses bawat buwan ng Komite Sentral ng Partido Komunista ng Pilipinas</div>	
<div><div> ang.bayan@cpp.ph</div><div> @angbayan1969</div></div>	

Pampartidong pag-aaral, inilunsad sa eryang ekspansyon sa NCMR

MAPANGAHAS AT DETERMINADONG inilunsad ng isang yunit ng Bagong Hukbong Bayan (BHB) sa isa sa mga eryang ekspansyon sa North Central Mindanao Region (NCMR) ang pag-aaral sa Batayang Kurso ng Partido (BKP) noong huling kwarto ng 2022. Sa kabila ng iba't ibang hamon, mata-gumpay na nakapagtapos sa pag-aaral ang 17 mga mandirigma ng BHB.

Nagsimula ang pag-aaral noong Nobyembre 26, 2022 at nagtapos noong Disyembre 18, 2022. Lahat ng mga estudyante ng BKP ay mga kaba-taang magsasaka at 2-3 taon nang kasapi ng hukbong bayan.

Habang idinadaos ang pag-aaral, nagpakat ang hukbong bayan ng isang yunit para sa gawaing masa at panlipunang pagsisiyasat sa kalapit na mga komunidad. Dahil nasa eryang ekspansyon, nagsisimula pa lamang ang pagsigla ng pagkilos ng masa sa lugar, na nasa ilalim ng pasistang pag-hahari ng mga pwersa ng reaksyunaryong estado.

Ilang ulit na nabalam ang pag-aaral dahil kinailangan maglipat ng kampo para makaiwas sa mga operasyon ng kaaway. Kada lipat ng kampo, nagtutulung-tulong ang mga mandirigmang estudyante at instruktur para makapagtayong muli ng paaralan para ipagpatuloy ang pag-aaral.

Sa kabila nito, hindi nagpatinag ang yunit sa mga hamon at natapos ang pag-aaral. "Karamihan sa kanila ay nabuhayan ng loob! Matagal-tagal na rin kasi nang huling nakapaglunsad ng kurso," kwento ng isa sa mga instruktur.

"Mas determinado akong magpunyagi sa rebolusyon dahil nalaman ko ang pinagdaanang kabiguan ng Partido at nakaya niyang magpunyagi at umabante," pahayag ng isang estudyante.

Ka Elay, huwarang babaeng kadre at mandirigma

PINARANGALAN NG KOMITE Sentral ng Partido Komunista ng Pilipinas si Helenita Parladis, 65, isa sa namumunong kadre ng Partido na napaslang noong nakaraang taon. Kilala siya ng masa at mga kasama sa Bicol at Sa-mar bilang si Ka Ning, Ka Eliz, Ka Celine at Ka Elay.

Kabilang siya sa daan-daang kababaihang kadre ng Partido na bumalik at mabibigat na tungkulin para isulong at paunlarin ang digmang bayan.

Sa nakaraang mga taon, pinamunuan niya ang pagharap sa walang awat na mga atake at operasyon ng kaaway sa pamamagitan ng papalawak at papalalim na gerilyang pakikipagdigma sa Eastern Visayas. Namatay siya sa pambobomba na ginawa ng militar noong Nobyembre 23, 2022 kasama ang lima pang Pulang mandirigma sa Barangay Imelda, Las Navas, Northern Samar. Sa araw na iyon, 50 beses na binomba ng militar ang lugar sa kalapit na komunidad mula 1:30 ng madaling araw hanggang 5:30 ng umaga.

Tubong Bicol, unang nagsilbing upisyal ng Partido si Ka Elay sa isang larangang gerilya sa Camarines Sur hanggang naging kalihim ng buong pru-binsya noong dekada 1990. Itinalaga siya bilang pangalawang kalihim ng National Peasant Bureau na nagsagawa ng abanteng mga kampanyang ag-raryo at sa kalaunan, bilang pangalawang kalihim ng komite ng Partido sa Eastern Visayas.

Nahalal siya bilang myembro ng Komite Sentral sa Ikalawang Kongreso noong 2016. Kalihim siya ng komite sa rehiyon ng Partido sa Eastern Visayas sa panahon ng kanyang pagkakapaslang. Pamana niya sa lahat ng rebo-lusyonaryong pwersa ang mahigpit na pagkakaisa sa pagitan ng hukbong bayan at ng masa.



Ipagtanggol ang mga tagapag-tanggol. Binati ng mga demokra-tikong organisasyon at tagasuporta ang 10 tagapagtanggol ng karapa-tang-tao, taong simbahan at lider-masa sa Quezon City noong Enero 9 matapos ibasura ng korte ang kasong *perjury* na isinampa laban sa kanila ni Gen. Hermogenes Es-peron.

Ipagtanggol ang karapatang mag-organisa. Nagpiket ang mga myembro ng Migrante at Kilusang Mayo Uno sa Department of Jus-tice noong Enero 16 para igiit na gawan ng aksyon ng estado ang samutsaring pag-atake sa kanilang mga myembro. Naganap ang pag-kilos ilang araw bago isapubliko ng International Labor Organizati-on ang resulta ng imbestigasyon nito sa kalagayan ng mga mang-gagawa sa bansa.

Isang araw bago nito, nagtungo sa pambansang upisina ng DOLE sa Maynila ang mga manggagawa mula sa Southern Tagalog para ipanawagan ang karapatan sa pag-uunyon, nakabubuhay na sahod at regular na trabaho. Nagtungo sila sa Mendiola pagkatapos nito.

SIM Card Registration, ipinasu-suspinde. Nagpiket sa harap ng National Telecommunications Commission ang mga aktibista pa-ra sa *digital rights* sa ilalim ng Junk Sim Card Registration Net-work para ipanawagan ang pag-suspinde ng mapaniil at kontra-mamamayang pwersahang pagparehistro.

Hustisya para kay Ka Manny. Sinugod ng mga manggagawa at aktibista ang DoJ noong Enero 18 matapos ipawalang-sala nito ang kaso laban sa 17 pulis na pumatay kay Manuel Asuncion, koordiney-tor ng Bayan sa Cavite. Pinaslang si Ka Manny noong 2021, kasabay ng walo pa sa tinaguriang Bloody Sunday.

Mula kwarantina tungong kanayunan

Ang sumusunod ay kwento ng isang myembro ng Kabataang Makabayan na nakiisa sa pagdiriwang ng Partido sa ika-54 anibersaryo nito sa isa sa mga larangang gerilya ng hukbong bayan.

Pagtapos ng Pasko, agad akong naghanda ng mga gamit na kinakailangan para sa aming pagbisita. Pinangingibabawan ng pananabik ang aking kaba sa mga bagay na di ko alam. Dalawang taon na rin akong kasapi ng Kabataang Makabayan (KM) pero dahil sa ipinataw na mahihigpit na *lockdown* sa tabing ng pandemyang Covid-19, ito ang unang pagkakataong masasaksihan ko ang mga kwentong dati ay naririnig ko lamang.



Tila saglit lamang ang byahe. Pagsapit ng gabi, narating namin ang sityo kung saan kami susunduin. Kabado kong hawak ang aking bag habang nakatingin sa padilim nang padilim na daan na aming tatahakin. Di kalauna’y nagsimula na kami sa paglalakad. Mabilis ang naging tibok ng aking puso sa paglalakbay sa lugar na hindi ako pamilyar.

Ilang sandali pa ay sumukal lalo ang daan—madilim, maputik at mabato. Sa totoo lang, matagal ko nang iniisip na hindi ko kaya maglakad sa putikan. Bilang petiburges na lumaki sa kalunsuran, maarte ako at ayo-kong nadudumihan. Hindi rin ako sanay maglakad sa mga mababatong lugar o kahit sa mismong paglalakad. Ayokong napapagod at pinagpapawisan.

Sa kabila nito, puno ng pasensya akong tinulungan ng mga kasama. Agaran nilang iniaabot ang kanilang kamay sa saglit na humingi ako ng tulong. Dito ko napagtanto kung gaano kabuti ng ating mga mandirigma, handa silang tumulong matiyak lamang ang aming kaligtasan. Naalala ko tuloy noong ibinahagi ko noon na wala akong perspektiba na pumunta sa kanayunan—tingin ko kasi hindi ko kayang mabuhay dito. Tugon sa akin ng kalakhan: “magtiwala sa mga kasamang aalalay sa ‘yo.”

Madaling araw na nang nakarating kami sa kanilang pwesto. Pagdating ay pinagpahinga kami sa aming tutulugan. Nahirapan akong magrelaks sa simula pero kalauna’y nakatulog din dala na rin ng pagod.

Maya’t maya lamang ay nagising ako sa ingay ng mga kasama na abalang naghahanda. Nasilayan ko ang pali-gid na maaliwalas. Sariwa ang simoy ng hangin. Paglingon ko, nakita ang mga mandirigma na nagpupulong. Una kong naisip, “ang angas nilang tingnan, para silang mga bida sa *anime* na napapanood ko.”

Ang mga sumunod na oras ay puno ng kwentuhan at tawanan. Unti-unti kaming nagkakilanlan ng mga kasama. Sa kwentuhan, natutunan ko ang mga sakripisyo at kinakailangang pagpupursige sa larangang pinili nilang tahakin.

Pagdating sa lugar kung saan ilulunsad ang selebrasyon, tumambad sa amin ang mga gawang obra ng mga kasama. Sa gitna ay makikita ang isang pinta kung saan nakasulat ang tema na: “Konsolidahin at ibayong patatagin ang Partido! Biguin ang kontra-rebolusyonaryong digma at terorismo ng estado ng rehimeng US-Marcos! Komprehensibong isulong ang demokratikong rebolusyong bayan!” At sa magkabilang gilid ay may pulang watawat ng Partido. Sa tabi nito ay mayroong karit at maso na nakaukit sa lupa. Simbolo ito ng pagpupugay sa dakilang guro at tagapaglingkod ng masang Pilipino na si Jose Maria “Ka Joma” Sison.

Pagsapit ng tanghali ay nagsimula na ang programa. Unang umawit ng “Internationale.” Manghang-mangha akong tumitingin sa lahat. Aking winawari na sa tagumpay, mas marami pang Pilipino ang sabay-sabay na aawit ng kantang ito. Nag-alay

ng mga pangkulturang pagtatanghal ang mga kasamang mandirigma. Di ko inaakalang ganoon sila kahusay. Hindi lamang sila mga mandirigma, sila rin ay mga artista ng bayan! Magiliw na nakipagsabayan ang kabataan sa mga pagtatanghal. Bakas sa mga mukha ng mga panauhin ang kanilang tuwa.

Kinagabihan ay naghanda na kami sa aming pag-alis. Sa saglit na panahon ng pananatili namin ay nagawa ko agad makabuo ng natanging ugnayan sa mga kasamang mandirigma at masang nakasalamuha namin. Umuwi ako nang walang pagsisisi. Dito ko lalong napagtibay ang aking mga perspektiba—na tama ang landas na aking tinatahak. Sa ilang araw ko sa kanayunan, maraming kwento at aral ang aking bitbit pauwi.

Naging mas madali ang paglalakad pabalik, wari’y nakabisa ko na sa maikling panahon ang daan at pamamaraan sa paglalakbay. Sa paggaan ng byahe pauwi, batid ko ang bigat ng mga tungkulin at gawain na kinakailangan para sa pagtatagumpay ng rebolusyon. Hindi maalis sa aking isip ang mga katagang binanggit sa kalagitnaan ng programa. “Namumundok tayo kasi dito higit kailangan ng paglilingkod sa masa.” Ngayon, mas malinaw sa akin ang aktwal na itsura ng armadong pakikibaka, mas matibay ang mga batayan para sa pagpapatulong ng laban at pagpapatibay ng ating hanay—pagsanib sa mga pakikibaka ng masang anakpawis at pagsisilbi sa masang api.

Pang-aabuso sa karapatang-tao, iigting sa patuloy na girian ng mga heneral

Iigting ang mga pang-aabuso sa karapatang-tao habang nagpapatuloy ang girian ng mga heneral sa ilalim ng tambalang Marcos-Duterte. Nagsimula ang mga giriang ito noong kalagitnaan ng 2022 at sumambulat sa unang mga araw ng 2023. Ang mga “bangayan” na ito ay sumasalamín sa malalim na kontradiksyon sa hanay ng magkaka-alyadong dinastiya sa pulitika at pangkatin sa loob ng naghaharing rehimeng Marcos.

Sa layong matigil ang balyahan para sa kurakot at apulain ang namumuong disgusto na maaring tumungo sa destabilisasyon, binalasa ni Ferdinand Marcos Jr ang mga susing pusisyon sa depensa, militar at pulisya. Sinipa niya sa pwesto ang itinalaga niyang upisyal at ibinalik ang pinakamasasahol na mga heneral na nagsilbi sa panahon ng rehimeng Duterte.

Nagsimula ang *rigodon* sa muling pagtatalaga kay Gen. Andres Centino bilang *chief of staff* ng Armed Forces of the Philippines (AFP), ang pusisyong iginawad ni Marcos kay Lt. Gen. Bartolome Bacarro, kinilalang “manok” ni Unang Ginang Liza Araneta-Marcos at ng noo’y Executive Sec. Vic Rodriguez. Bilang protesta sa walang dangal na pagsipapa kay Bacarro, nagbitiw bilang *officer-in-charge* ng Department of National Defense (DND) si dating Gen. Jose Faustino, Jr. Sinundan siya sa pagresayn ng lima pang senyor na mga upisyal ng DND. Ipinalit sa kanya si Gen. Carlito Galvez Jr, dating *presidential adviser on the peace process* at hepe ng sobrang palpak at batbat sa korapsyong pagtugon ng rehimeng Duterte sa pandemyang Covid-19.

Pinakahuling sinipa sa pusisyon si Prof. Clarita Carlos, na nauna nang pinag-initan ng mga heneral dahil sa panawagan niyang bawasan ang badyet ng NTF-Elcac. Ipinalit sa kanya ang ultra-militaristang si Gen. Eduardo Año bilang National Security

Adviser (NSA).

Habang nag-aagawan ang mga heneral at koronel sa matatabang pusisyon ng AFP, isinailalim naman sa “full alert” ang buong pwersa ng Philippine National Police (PNP). Ayon sa burges na midya, may kumalat na memo tungkol sa tangkang kudeta at destabilisasyon. Sinundan ito ng pakitang-tao na pagpapabitiw sa 800 pulis-heneral sa kanilang mga pusisyon.

Sa harap ng tinaguriang “larong mga heneral,” nagpahayag ng pagkabahala ang mga progresibo at demokratikong organisasyon dahil lalong iigting ang mga pang-aabuso sa karapatang-tao at mga krimen sa digma. Kilala sina Año, Galvez at Centino sa pinakabrutal at pinakamaruruming galaw sa gera kontra-mamamayan. Mahaba at madugo ang listahan ng kanilang mga paglabag sa karapatang-tao at mga internasyunal na makataong batas. Matatandaang ang mga ito, kasama ang dating *adviser* ng NSA na si Gen. Hermogenes Esperon, ang pinakamalalaking balakid sa usapang pangkapayapaan.



Lalong humigpit ang paghawak ng militar sa burukrasyang sibil sa pagkahirang kina Año, Galvez at Centino. Alinsunod sa doktrinang “anti-terorismo” at anti-komunistang kontra-insurhensya ng US, ang militar ay magpapatuloy sa pagtukoy at pagdikta sa mga patakaran ng estado at ilalagay ang mga ahensyang sibilyan sa kontrol nito tulad sa ipinairal ng National Task Force to End Local Communist Armed Conflict (NTF-Elcac).

Sa pagbalik ng mga heneral ni dating pangulong Duterte, aasahang magpapatuloy ang mga brutal na taktika sa kontra-insurhensya. Hahadlangan nila ang usapang pangkapayapaan sa pagitan ng National Democratic Front of the Philippines at Government of the Republic of the Philippines. Ang bokabularyong alam lamang nina Año, Galvez at Centino ay solusyong militar. Ang kapayapaang alam lamang nila ay ang “kapayapaan ng sementeryo”.

Sa harap nito, inatasan ng Partido ang lahat ng mga komite nito, gayundin ang mga yunit ng BHB na samantalain ang mga girian, kalituhan at maniobrahan sa loob ng AFP at PNP. Dapat silang maglunsad ng propaganda at edukasyon sa loob ng militar at pulis, laluna sa pinakamababang hanay para hikayatin silang talikuran ang bulok na organisasyon at makipagtulungan sa rebolusyonaryong mga pwersa.

Anito, ang mga giriang ito ay uuntol at uuntol sa mga operasyong kontra-insurhensya, laluna kung may mga maniobrang kudeta at kontra kudeta ng mga tropa. Dapat mag-inisyatiba ang BHB at paigtingin ang gawaing militar at pulitika sa buong bansa at umani nang malaki sa harap ng kaguluhan ng kaaway. **AB**

2 aktibista sa Cebu, dinukot at pinakawalan

Napilitang pakawalan ng mga pwersa ng estado ang dalawang aktibis- tang Cebuano noong Enero 16 matapos lumakas ang panawagang ili- taw sila. Pwersahang isinakay sa isang *van* ng mga nagpakilalang pulis sina Dyan Gumanao at Armand Dayoha sa daungan ng Cebu noong tanghali ng Enero 10 sa gitna ng maraming nakasaksi. Dinala sila sa isang *safehouse* kung saan ipinailalim sila sa sikolohikal na tortyur. Inilitaw sila noong Enero 16 sa isang resort sa bayan ng Carmen matapos maglabas ang pamilya ng mga larawan ng pagdukot sa kanila.

Si Gumanao ay koordineytor ng Alliance of Concerned Teachers pa- ra sa Rehiyon 7 habang si Dayoha ay boluntir para sa balangay ng Al- liance of Health Workers sa Cebu. Ang dalawa ay kapwa gradweyt ng University of the Philippines-Cebu.

Sa isang bidyo na kuha ng isang saksi, makikita ang sapili- tang pagsasakay sa dalawa sa isang kulay abo na SUV na naka- parada sa mismong daungan ng barko na bawal sa mga pribadong sasakyan. Bago lumitaw ang bid- yo na ito, itinanggi ng mga upi- syal ng daungan, pulis at tauhan ng barkong sinakyan nila na nag- karoon ng "insidente ng pagdu- kot" sa lugar sa araw na iyon. Panawagan ng pamilya at mga grupo ng karapatang-tao ang in- dependyenteng imbestigasyon kaugnay ng pagdukot hindi la- mang sa mga pulis, kundi pati sa daungan at mga tauhan sa pyer.

Pagpatay. Sa katabing isla ng

Negros, dalawang magsasaka ang pinatay at isa ang tinangkang pa- tayin ng militar sa nakaraang da- lawang linggo. Tulad sa ibang ka- so, pinalabas nitong napaslang sila sa mga engkwentro sa mga yunit ng BHB.

Sa Guihulngan City, pinatay ng mga sundalo ng 62nd IB si Orlando Fat sa Sityo Banderahan, Bara- ngay Trinidad noong Enero 10. Ti- nangka namang patayin si Rodrigo Pasinabo sa Sityo Cambaogon noong Enero 15.

Ang mga ito ay bahagi ng ma- laking operasyong kombatan ng 62nd IB sa mga barangay na nasa bawndari ng Guihulngan City, Canlaon City at bayan ng Moises Padilla.

Sa Himamaylan City, pinaslang ng mga sundalo ng 94th IB ang 49-anyos na magsasakang si Jose Gonzalez sa Purok Maliko-liko, Sit- yo Cunalom, Barangay Carabalan noong Enero 9.

Ambus sa Sorsogon, isnayp sa Negros, inilunsad ng BHB

TATLONG PASISTANG SUNDALO ng Armed Forces of the Philippines (AFP) ang napaslang sa mga armadong aksyon ng Bagong Hukbong Bayan (BHB) sa isla ng Negros at Sorsogon noong Enero 15.

Inambus ng BHB-Sorsogon ang nag-ooperasyong 18-kataong tropa ng 22nd IB at CAGU sa Barangay Calmayon, Juban, Sorsogon. Isang mi- yembro ng CAGU ang nasawi habang dalawa ang nasugatan. Ang inambus na yunit ay kabilang sa tropang nag-ooperasyon sa mga magkakatabing barangay ng Calmayon, Maalo at Calateo sa bayan ng Juban at Barangay Calpi at Dolos sa bayan ng Bulan simula pa 2020.

Magkasunod na operasyong isnayp ang inilunsad ng BHB-Central Negros sa parehong araw. Napatay dito ang dalawang sundalo. Unang inisnayp ng mga Pulang mandirigma ang tropa ng 62nd IB sa Sityo Palasan, Barangay Guba, Vallehermoso, Negros Oriental. Pagsapit ng alas-6 ng gabi, inisnayp naman nito ang mga sundalo sa Sityo Batang-batangan, Barangay Bucalan, Canlaon City.

Pamilya, minasaker sa Northern Samar

ISANG PAMILYA ANG minasaker ng mga sundalo ng 43rd IB sa Kilomet- ro 9, Barangay Happy Valley, San Isidro sa Northern Samar noong Nobyembre 18, 2022. Pinalalabas ng mga pasista-teroristang sundalo na sila ay mga mandirigma ng BHB na napaslang sa engkwentro. Naka- pailalim sa matinding operasyong kombatan ang lugar.

Sa huling kwarto ng 2022, hindi bababa sa tatlong serye ng pambo- bomba ang inilunsad ng militar sa prubinsya. Noong Oktubre 1, 2022, hindi bababa sa 25 bala ng kanyon ang pinakawalan ng mga sundalo gamit ang 105mm at 155mm *ho- witzer* sa mga sakahan sa Barangay Paco, Las Navas, Northern Samar. Sinundan ito ng isa pang pambo- bomba sa Barangay San Isidro noong Nobyembre 11, 2022.

Sanggol, 2 taon nang hostage ng militar

DALAWANG TAON NANG nakahi- walay ang ngayon ay 2-taong gulang na si Baby Marx Cairo Salino sa kanyang pamilya. Noong Enero 13, 2021, inagaw siya ng 79th IB sa isang reyd sa bahay ng pamilyang Madin sa Hacienda Ambulong, Ba- rangay San Fernando, Talisay City, Negros Occidental.

Mula noon, hawak na ng militar ang sanggol at ayaw ibalik sa kus- todiya ng mga kamag-anak. Si Baby Marx ay anak nina Ka Peeta at Ka Jandy, parehong mandirigma ng Bagong Hukbong Bayan sa Negros.

Ginagamit ng militar na *hostage* si Baby Marx para pasukuin ang kanyang magulang. Ipinagkakait si- ya ng DSWD sa kanyang lolo at lola dahil kailangan pa diumanong “kon- sultahin” ang militar.

Paulit-ulit na ring isinailalim sa panggigipit, pananakot at pagma- manman ang lolo at lola ni Baby Marx. Noong unang kwarto ng 2022, nireyd ng mga sundalo ang kanilang pansamantalang tinutuluyan. Dahil dito, napilitan silang magtago.

Sa unang buwan ng 2023:

Nagtataasang presyo ng pagkain, batayang serbisyo

Magkasabay na delubyo ng sumisirit na presyo ng batayang mga bilihin at serbisyong panlipunan at walang tigil na pag-ulan at pagbaha ang sumalubong sa mamamayang Pilipino sa pagpasok ng 2023. Sa harap nito, walang solusyon ang rehimeng Marcos sa tumitinding krisis sa kabuhatan liban sa pakitang-taong mga hakbang.



Nagtataasang presyo ng pagkain

Nananatiling nakapako sa ₱400-₱550 ang kilo ng sibuyas sa pamilihan dahil sa pagtatago, pagmanipula sa suplay at labis-labis na pagpepresyo ng mga kartel sa agrikultura. Dagok sa konsyumer ang napakataas na presyo habang nananatiling luhaan at lubog sa utang ang mga magsasaka ng sibuyas dahil sa pagkalugi.

Ayon sa Kilusang Magbubukid ng Pilipinas, umabot lamang sa ₱30 kada kilo ang *farmgate price* ng sibuyas noong nakaraang taon sa Nueva Ecija. Sa kabilang banda, gumagastos ang magsasaka ng ₱150,000 kada siklo ng pagtatanim. Sa Occidental Mindoro, sumadsad pa ito sa ₱8-15 kada kilo.

Ibinahagi ni Merlita Gallardo, asawa ng isang magsasaka ng sibuyas sa Pangasinan, nagpatiwakal ang kanyang asawa noong 2021 dahil sa pagkalugi. Liban kay Gallardo, may apat pang ibang magsisibuyas ang nagpatiwakal.

Mapait pa rin ang kape dahil sa nananatiling napakataas na presyo ng asukal. Ang nirepinang asukal ay nasa ₱90 hanggang ₱110 kada kilo habang ₱80 hanggang ₱96 ang *brown sugar*. Tumaas ito nang halos ₱10-15 kumpara sa huling kwarto ng 2022.

Tulad sa nagdaang mga rehimen, importasyon ang solusyon ni Marcos sa krisis sa pagkain. Noong Enero 10, pinahintulutan niya ang pag-angkat ng 17,100 metriko tone-

ladang pulang sibuyas at 3,960 metriko toneladang puting sibuyas. Ito ay sa kabila ng mag-aanihan na ng lokal na sibuyas sa Pebrero.

Samantala, nagbabalak ang gubyrerno na mag-import ng hanggang 450,000 metriko tonelada ng asukal ngayong taon sa tabing ng pag-ampat sa sumisirit na presyo.

Isiniwalat kamakailan ng mga prodyuser ng itlog na tuluy-tuloy pang tataas ang presyo ng itlog sa merkado ngayong taon. Nasa ₱9-₱10 na ngayon ang karaniwang presyo ng katamtamang-laking itlog, mula sa ₱6.90-₱8.50 noong Disyembre 2022. Gayunpaman, marami nang palengke ang nagbebenta ng regular na laking itlog nang ₱10 kada piraso.

Isa sa itinatuturing dahilan ng mga prodyuser ang pagbwelo ng *bird flu* na hanggang ngayon ay hindi inaatupag ng Department of Agriculture. Ayon sa datos ng Bureau of Animal Industry, apektado ng pandemyang ito ang 20 prubinsya sa walong rehiyon. Nagresulta ito sa pagkatay sa 1.8 milyong manok na apektado.

Liban dito, may banta rin ng pagtaas nang ₱2 kada kilo sa presyo ng bigas sa darating na mga buwan. Inaasahan din ang pagtaas ng presyo ng tinapay dahil sa tumataas na presyo ng itlog at ibang sangkap.

Gasolina, kuryente, tubig at pamasaha

Ngayong Enero, nagtaas na ng

netong ₱3.1/litro ang presyo ng gasolina habang ₱0.8/litro ang sa kerosene. Hinila nito tungong abereyds na ₱70 kada litro ang gasolina.

Inianunsyo ng Manila Electric Company (Meralco) ngayong buwan na tataas ang singil nito sa kuryente ng ₱0.62 kada *kilowatt-hour* (kWh). Maniningil na ito ng ₱10.9 kada kWh ngayong buwan. Sa regular na konsumo ng isang pamilyang Pilipino na 200 kWh, nangangahulugan ito ng dagdag na ₱125.

Samantala, sisimulan nang kunin ngayong Enero ang dagdag-singil sa yutilidad na tubig sa Metro Manila na ₱8.04 kada metro kubiko para sa mga naka-kunekta sa Manila Water habang ₱3.29 kada metro kubiko ang sa Maynilad.

May pangamba ring itataas ang pamasaha sa LRT ngayong taon. Maaari itong dagdagan ng ₱2.29 para sa pagsakay at ₱0.21 sa mga kasunod na kilometro. Ang dating pasahe na ₱13 ay maaaring maging ₱15 habang ang mas malalayong byahe na nagkakahalaga ng ₱15 ay magiging ₱20. Itataas ang singil sa pasahe kada dalawang taon sang-ayon sa kontrata ng pribadong mga kumpanyang nagmamay-ari sa tren at gubyrerno.

Samantala, nakatakdang itaas ang presyo ng *liquified petroleum gas* (LPG) sa darating na Pebrero.

9 na bilyunaryong Pilipino

ay may yamang mas malaki kaysa **55 milyong** Pilipino.

Pinagkunan: Oxfam Pilipinas



32 Blackhawk helikopter


na kinontratang bibilhin ng AFP sa halagang **P32 bilyon**.

P45 B

badyet para sa modernisasyon ng AFP sa 2023

matapos dagdagan ng **P6 bilyon** ng Kongreso sa gitna ng girian ng mga heneral para sa kurakot.

228




susing *biodiversity area*

o mga lugar na mahalaga para sa kalusugan ng planeta ang natukoy ng mga syentista sa Pilipinas, pero 91 lamang dito ang protektado.

Pinagkunan: International Union for Conservation of Nature

70

kamag-anak, alipures at negosyante



ang isinama ni Marcos Jr sa paglamyerda sa **Switzerland** noong Enero 16-20 sa pagdalo niya sa World Economic Forum. Ang byaheng ito ay pang-8 na sa loob ng 7 buwan.

JMSU Joint Marine Seismic Undertaking,

isang kasunduan sa pagitan ng Pilipinas, China at Vietnam para minahin ang **West Philippine Sea** ay idineklarang **di konstitusyunal** ng Korte Suprema noong Enero 10.



22 syudad at munisipalidad

ang nakapailalim sa **state of emergency** mula Disyembre 2022 dulot ng matitinding pagbaha dahil sa mga pag-ulan.

324 pinaslang sa huwad na gera kontra-droga noong 2022,

49 sa huling 6 na buwan ni Duterte at **175** sa unang 6-buwan ni Marcos.



60,000 sanggol at batang Pilipino



ang **namatay noong 2021** bago mag-5-taong gulang dulot ng mga kumplikasyon sa kalusugan na kayang iwasan.

Pinagkunan: United Nations Inter-Agency Group for Child Mortality Estimation

Paggamit ng US sa Pilipinas sa paghahanda sa gera kontra China

Tahasang nilalapastangan ng gubyernong Biden ng US ang kasarinlan ng Pilipinas sa ginagawa nitong paghahanda ng "teatro ng gera" laban sa karibal nitong imperyalistang China. Kasama ang Japan, South Korea, Singapore at iba pang bansa sa tinagurian nitong "first-island chain" o kawing ng mga islang pinakamalapit sa China, ang Pilipinas ngayon ay pinupwestuhan ng US ng mga tauhan at kagamitang militar na handang gamitin sa saglit na sumiklab ang digmaan.

Malinaw na malinaw na sinabi ni Lt. Gen. James Bierman, *commanding general* ng Third Marine Expeditionary Force (III MEF) at Marine Forces Japan ng US, na malaon nang pinaghahandaan ng US ang paglulunsad ng gera kontra China, at inihalintulad ang paghahanda dito sa ginawa nilang paghahanda ng gera sa Ukraine laban sa Russia. Sa interbyu kamakailan ng Financial Times, sinabi ni Bierman:

"Paano natin natamo ang antas ng tagumpay sa Ukraine? Malaking bahagi niyon ay dahil mula nang pagsalakay ng Russia noong 2014 at 2015, nagsikhay tayong maghanda sa mga digmaan sa hinaharap: pagsasanay sa mga Ukrainian, pagpusisyon ng mga suplay, pagtukoy ng mga lugar kung saan pwede tayong magbigay ng suportang operasyon, isustine ang operasyon... Tawag natin diyan ay paghahanda ng teatro. At inihahanda natin ngayon ang teatro sa Japan, sa Pilipinas at iba pang lugar."

Ipinakikita ng mga salitang ito ni Bierman ang kapalaluan ng imperyalistang US sa pagtutulak nitong ipataw ang kapangyarihan nito saan mang panig ng mundo na walang pagsasaalang-alang sa soberanya ng mga bansa, laluna ng mga malakolonya nito tulad ng Pilipinas. Itinuturing nitong mistulang tau-tauhan sa larong *chess* ang mga bansang "alyado" nito sa estratehiya nito na palibutan ang China.

Sa paggamit ng US sa

Pilipinas bilang bahagi ng "teatro ng digma" nito laban sa China, ginagawa itong *magnet* o target ng posibleng pag-atake ng China sakaling sumiklab ang gerang US at China. Tahasang paglapastangan sa kasarinlan ng Pilipinas ang paggamit sa bansa na lunsaran ng US ng mga gera nito sa ibayong-dagat.

Nagagawa ito ng US sa Japan, Korea at Pilipinas dahil ang mga na-kaupong gubyerno sa mga bansang ito ay mga sunud-sunuran sa dikta ng US. Buong-larga ngayon ang gubyerno ni Fumio Kishida ng Japan sa pakikipagkutsabahan sa militar ng US, kabilang ang pagpapalaki ng gastos para bumili sa US ng mga misayl na kayang tumama sa mga target na 1,000 kilometro ang layo. Itinutulak naman ni President Yoon Suk Yeol ng Korea ang pagpupwesto ng mga armas nukleyar ng US sa kanilang bansa. May malalaking base militar ang US kapwa sa Japan at

Korea.

Noong nakaraang taon, idineklara ng gubyernong Marcos ang planong bigyang-daan ang pagtatayo ng US ng lima pang mga pasilidad sa mga lugar na pinili ng US: dalawa sa prubinsya ng Cagayan, at tig-isa sa Isabela, Zambales at Palawan. Dagdag ito sa lima nang pasilidad militar ng US sa loob ng mga kampo ng AFP na itinayo sa ilalim ng Enhanced Defense Cooperation Agreement (EDCA). Pinaniniwalaang gagamitin ng US ang mga pasilidad na ito para ipwesto ang mga *ground-to-air missile system* na nakatutok sa China.

Ang gayong mga pasilidad ay bahagi ng estratehiya ng US na itulak ang China na "unang bumunot ng baril." Kabilang sa pang-uupat na ito ang pagpalayag ng mga barkong pandigma sa Taiwan Strait na kinikilalang teritoryong pandagat ng China sa ilalim ng One China Policy, dagdag pa ang walang hintong paglalayag ng mga *aircraft carrier* nito sa kanluran at sila-ngang karagatan ng Pilipinas at sa silangan ng Japan, pati na ang sunud-sunod na mga "pagsasanay sa gera" sa Pilipinas, South Korea at Japan, gayundin sa India, malapit sa hangganan ng China.

Ang pang-uupat ng US ng gera sa China ay bahagi ng pagtutulak nito na kontrolin ang mga pamilihan at pagkukunan ng rekurso. Ang ilang dekadang pakikipagsabwatan sa mga monopolyo buruk-ratang kapitalista sa China ngayo'y isang namumuong tunggalian sa ekonomya at militar. Layunin ng US na agawin ang malalawak na pamilihing dinodominahan ng murang kalaal ng China.



Naval Station Carlito Cunanan: base militar ng US sa Palawan

Ang Naval Station Carlito Cunanan (NSCC) ay isa sa dalawang base militar ng US sa Palawan sa ilalim ng Enhanced Defense Cooperation Agreement ng US at Pilipinas. Itinayo ito sa ilalim ng rehimeng Aquino II bilang bahagi ng pagtitiyak ng US sa kontrol sa karagatan ng Indo-Pacific. Parte ito ng tinatawag na “first island chain” (Japan, Taiwan, Pilipinas, Borneo, at iba pa) laban sa China. Matatagpuan ang NSCC sa Oyster Bay, bahagi ng Ulugan Bay sa Puerto Princesa City.

Ang naturang base militar ay lihim na pinaunlad at pinagkagastusan ng AFP na may suporta ng US upang maging “mini-Subic” para pagsilbihin sa mga sundalong Amerikano at maging istasyon ng mga barkong pandigma ng imperyalismong US. Tinatayang 160 kilometro ang layo nito sa Spratly Islands kung saan nakapusisyon ang mga pasilidad-militar ng China.

Nang itinayo ang NSCC sa Ulugan Bay, winasak nito ang kalikasan at naghatid ng polusyon sa kapaligiran. Sinagasaan ng mga itinayong imprastruktura at pasilidad-militar ng US ang mayaman at protektadong bakawanan at mga bahura.

Walang permit mula sa Community Environment and Natural Resources (CENRO) ang ginawang pagpuputol sa mga puno sa lugar gayong protektadong erya ang look.

Matindi ang epekto nito sa buhay, kabuhayan at ari-arian ng nasa 1,700 residente ng Barangay Macarascas, isa sa limang baryong nakapalibot sa Ulugan Bay. Malawakang pinalayas ang mga residenteng naninirahan sa lugar matapos idemolis ang higit sa 100 tirahan upang bigyang-daan ang base militar. Nawalan ng lugar para sa hanapbuhay ang mga mangingisda dahil ang

buong Ulugan Bay ay naging bahagi ng daungan ng malalaking barkong pandigma ng US. Binabari ng mismong mga sundalong Pilipino ang bangka ng mga mangingisdang mapalapit sa look.

Nagdulot ang base militar ng mga pag-abuso sa mamamayang Palaweno. Lumobo ang mga kasong pandarahas, pang-aabuso sa mga kababaihan at bata at iba pang mga paglabag sa karapatang-tao ng mga mersenaryong sundalong Amerikano at AFP. Lumaganap ang prostitusyon at *sex trafficking* matapos itayo ang hilera ng mga bar o bahay-aliwan sa Puerto Princesa upang magsilbi sa mga sundalong Amerikano. May mga ulat na may isang *van* na naglalaman ng mga kababaihan na ipinasok sa mismong sayt kung saan naroon ang NSCC.

Hinalaw mula sa Ang Pulang Larangan, rebolusyonaryong pahayagang masa sa Palawan.

AB

Aerial bombing sa komunidad ng mga katutubo sa India, kinundena ng CPI (Maoist)

KINUNDENA NG Communist Party of India (Maoist) ang brutal at desperadong pambobomba ng mga armadong pwersa ng gubyrerno ng India sa hindi bababa sa siyam na komunidad sa bahaging South Bastar sa hangganan ng Chhattisgarh-Telangana noong Enero 11 ng umaga. Anang grupo, nagsimula sa alas-11 ng umaga ang walang-awat na paghuhulog ng mga bomba sa komunidad para maghasik ng takot at sindakin ang mga katutubo.

"Malinaw sa ginawang ito ng reaksyunaryong gubyrerno kung gaano ka-desperado ang pasistang Bharatiya Janata Party na durugin ang mga pwersang Maoista," saad ni Kasamang Abhay, tagapagasalita ng CPI (Maoist). Aniya, napilitang gumamit ng mga sasakyang panghimpapawid ang mga pasista dahil sa takot na pumasok sa kalupaan ng kagubatan kung saan posibleng salubungin sila ng armadong paglaban ng mga katutubo. "Dahil ang mga tao sa mga rehiyong ito ay may mataas na pulitikal na kamulatan, nanginginig sa takot ang Central Reserve Police Force at iba pang pwersa na mag-operasyon sa kalupaan," ayon pa kay Abhay.

Layon ng mga pag-atake na paatrasin at buwagin ang pagkakaisa ng mga katutubo para maibenta ang lahat ng natural na rekurso sa rehiyon sa mga imperyalista at burgesyang kumprador.

Sa harap ng pag-atake ng kaaway, nagawang patamaan ng mga pwersa ng People's Liberation Guerilla Army ng CPI (Maoist) ang umaatakung mga pwersa. Nasira nito ang isang helikopter ng kaaway at nasugatan ang anim na pasistang sundalo.

Ayon pa kay Abhay, nakatitiyak sila na patitindihin pa ng gubyrerno ng India ang paggamit ng *aerial strike* at *aerial bombing* para tugisin ang pamunuan ng CPI (Maoist). Ngunit, aniya, "dapat malaman ng kaaway na hindi matutumbasan ng mga bomba at *drone* nila ang kahandaang magsakripisyo ng bawat isang gerilya, hindi nito madudurog ang rebolusyong Indian."

Presensya ng US sa Cagayan, itinatakwil

ITINATAKWIL NG MAMAMAYAN sa Cagayan Valley ang napipintong pagtransporma ng mga kampo militar ng AFP tungong mga pasilidad ng militar ng US, alinsunod sa pagdadagdag ng lima pang lokal na kampo ng US sa ilalim ng tagibang na Enhanced Defense Cooperation Agreement. Gagamitin ng US ang mga pasilidad na ito bilang permanenteng base ng gamit-militar at tropang Amerikano.

Sa taya ng National Democratic Front of the Philippines-Cagayan, ipagagamit ng papet na rehimeng Marcos sa mga pwersa ng US ang mga kampo militar ng AFP sa Sta. Ana at Lal-lo. Isa pa ang 50-ektaryang lupang inaagaw ngayon ng AFP mula sa mga magsasaka sa Divilacan, Isabela.